

तुबारि संपादकीय
टीम

◆ अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆ इस तुबारि मासिक पत्रिका समाचार पत्र एकट अन्तर रिजिष्ट्रि नेई भो। सिर्फ पांगि घाटि अन्तर पढ़ू जे इ पत्रिका शुरु कियो सि।

◆ तुबारि यक अवाणिज्यिक पत्रिका भो।

◆ तुबारि पत्रिका कोइ मेहणु, जनजाति, त संस्कृति गलित कहेण जे नेई छपाण लगे। अगर कोइ ई सोचता बि त अस जिम्मेवार नेई।

◆ छपाणे पेहले सोभ आर्टिकल दुई टाई पांगेई मेहणु हरा लो असे। इ त खुलि बोक असि कि पेहिल वार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆ आर्टिकल्स ना मिएल, या घाटि मेहणु के मदद ना मिएल त तुबारि पत्रिका कदि बि बंद भुई सकति।

◆ कोइ चिज छपां सि या नेई छपां जे तुबारि संपादकीय टीमे पुरा अधिकार असा।

◆ अस सोभि पांगि मेहणु जे हात जोड कई निवेदन कते कि, तुस बि कोइ अछा आर्टिकल, पुराणि या नौइ कथा, कहावत, कविता, त नौवे धीत (पांगवाडी अन्तर) लिख कइ छपां जे हेंनदे दिए।

◆ अस किलाड केन्द्रीय पुस्तकालय, त बजार राखे ठेके भैड हरिरामे दुकान अन्तर तुबारि ड्रॉप बॉक्स पुठ बि अपुं सझाव ओर आर्टिकल्स रखुं जे सुविधा कियो असि।

☎ 9418431531

☎ 9418429574

☎ 9418329200

☎ 9418411199

☎ 9418411599

अंतर कउं भैण

यक जिल्हाणु, अपु गीहे अगर टाई मेहणु बिशो केते। से सोचती मनचा! ऐ बिचारे दुके त ठने से। त से तठी घेई कइ तेन्हि जे बोति “तुस अनजाणे असे। फी बि तूं शाबुशे तुस, अन्तर आए त आग सेकीण दिए त कुछ खाण दिए।

त तेन्हि बुछ यक बोता “गीहे मालिक अन्तर असा ना”। से बोति “ना, से कमणु जे गो सा। से मेहणु बोता “तउं त अस अन्तर एई न सकते”। पता जपल तसे धाणि गी एन्ता त से

अपु धाणि जे सोब कुछ

बतान्ति। तसे धाणि बोता

“गा त तेन्हि भियांण दे”।

जपल से तेन्हि मेहणु

अन्तर भियांन्ति, त से

बोते “मी कइ अस कदि

यक गी न घेन्ते”।

जिल्हाणु बोति “से किस?”

तेनि बुछ यक बोता “में

नउं ‘धन’, इस नउं

‘सफलता’ त होरे एस नउं ‘प्यार’ असु। त अभेई अन्तर गा त अपु धाणि जुए बोक-विचार

कर कि असी बुछ केस अन्तर एण”। से जिल्हाणु अन्तर घेई कइ अपु धाणि जे बोति, से

बोता कि अस ‘सफलता’ अन्तर भियान्ते, ताकि अस हर कम अन्तर सफलता पान्ते। पर

तसे जुएलि नाराज भोई कइ बोति “ना ना, अस धन भियान्ते। ताकि हे गी धने बोलि

भरीएल, तउं अउं अब्बुल अब्बुल सूट त कॅन्टुड लाई सकति। गां अन्तर हें इज्जत बि

बधती। ई भोई कइ से दुईए बोकि बोकि अन्तर झगडीण लग घेन्ते।

पता होरे कमरे अन्तर तन्के बेउठी बिशो भुन्ति त से ठटी शुणति। से तठि एई कइ बोति

कि “ई किस ना कते, अस ‘प्यार’ अन्तर भियान्ते, ताकि अस सोब अपफ बुछ प्यार जुएई

बिश्ते”। ए गल तेन्हि धाण जुएलि खारि लगति। त से ‘प्यार’ भियाण जे घेन्ते। से बोति

“तुसि बुछ ‘प्यार’ कोउं सा, छने! अन्तर एइए”।

जपल ‘प्यार’ घेण जे खडिन्ता त ‘धन’ त ‘सफलता’ बि तस पतूं खडिन्ते। त से जिल्हाणु

बोति “तुस किस एण लगे से”। से बोते “प्यार जेठ घेन्ता, अस बि ता घेन्ते। बिना प्यार

अस बिशी न सकते।



मुहावरे त कहावत

- ☛ जे भ्याग मारे कदि न हारे - जो सुबह उठता है, उसका कोई भी काम अधुरा नहीं रहता।
- ☛ दाछि पकणेल, कागे मुहँ बाड़ - सही समय पर खराबी आना।
- ☛ दुक न तोपती शाग, उंघ न तोपती बिछाण - जरुरत में कोई भी चीज चलती है।
- ☛ साचे बुढी जिआण - सभी की बारी आती है।

- ❖ जेतु चादुर तती जंघ टडीं - जितना कमाई है, उतना ही खर्चा करना। (कोया, जेतु चादुर तती जंघ टडीं, ना त अस सोबी नगी भोई घेन्ते)
- ❖ ना देणी बुध त मन्गे किढण बार - देना तो नहीं है, ऐसे ही बहाना बनना।
- ❖ बक भोई घेण - थक जाना।
- ❖ ना गीहे ना घते - कहीं का भी ना रहना।
- ❖ सुखान्ती नाओ - पसन्द ना करना। (शालु राणि तस सुखान्ती नाओ)
- ❖ बथ भिथ लगुं, (फाट खड़ी घेण) - रास्ता बन्द हो जाना/ रास्ता गुम हो जाना। (में अगर फाट खड़ी गोड।)
- ❖ तालु सुखाण छाण - चुप करना। (लालु तस तालु सुखाई छड़ा)
- ❖ यक कान त सोड मारते मुग - एक तीर से सौ मृग मारना।
- ❖ यक लिंगं कठे हन्डि शाग बणतु, दुबारि तथा आग लगति - एक बार तो किसी को ठग सकते हैं, पर दुसरी बार पकड़ा जाते हैं।
- ❖ चोरे मन खादेड़ा - चोर की मन गोठली पर होता है।

कुछ खास खबर

- ◆ 22 अप्रैल 2012 साक्षर भारते तहत पूरे पेगेई अन्तर असाक्षर मेहणु के ईम्तहान शुरू भुण लगोसे।
- ◆ पुरी पेगेई घाटी अन्तर बाणे कम शुरू भुई गो असु।
- ◆ लिशु त्योहार 13 अप्रैले तियेस असे।
- ◆ मार्च अन्तर 8वी, 10वी त 12वी बोर्ड ईम्तहान खत्म भोई गो।

नीतु त मिनु

By Shubham



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

खाने दुवांइ नेणे वक्त एक्सपाईरि डेट हेरुं जरूरी असी।

ट्यारे पंगेई मेहणुओ, खाने दुवांइ नेणे वक्त अस यक चिज पुठ ध्यान रखुणे जरूरी असी। दवखाना या हस्ताइ कैआं दुवांइ नेणे टेम, दुवांइ किखेइं बणोसे डेट, त दुवांइ किखेइं एक्सपाईरि भुणे डेट पुठ पक्का ध्यान रखे। (एक्सपाईरि भुणे डेट - दुवांइ काम करणे गुण खतम भुणे टेम) टिकि पत्ते पतुं, पिणे दुवांइ बोतुल पुठ, सुयि दुवाइ बोतुल पुठ बि ई सोब छपो भुन्तु। एक्सपाईरि दुवांइ खाणे बोली, बिमारी ठीक न भुन्ति, त होरा रियाकषन बि भोइ सकता। रियाकषने बोलि पुरा जिशम कशीण लगता, दिल घबराण, चक्कर एण बगैरा बगैरा नुकसान भुन्ति, त कदि-कदि मेहणु मर बि सकते। इस जुए, एक्सपाईरी डेट पुठ नजर रख कइ तस दुवांइ न खायेल, असी कोई नुकसान न भुन्ता। अगर हस्ताइ अन्तर एक्सपाईरी दुवांइ देयाल, त डाक्टर साब जे बोलि कई होरे दुवांइ नेण।

